

SUKAN KOMANWEL



Gold Coast 2018
4 - 15 April

10 atlet sandaran di Gold Coast

Gold Coast

Kontinjen negara menghantar 178 atlet (102 lelaki dan 76 wanita) bertanding dalam 16 jenis sukan di Sukan Komanwel Gold Coast yang akan disingkap tirainya, hari ini.

Berikut adalah 10 atlet negara yang perlu diberi tumpuan dan menjadi pertarungan kontinjen negara untuk membutuhkan pingat emas sepanjang temasya kedua terbesar dunia itu:



Pandelega Rinong (terjun)

Atlet kelahiran Sarawak ini adalah penerjun paling berjaya di negara ini dengan deretan koleksi pingat di kejuaraan dunia, Olimpik dan beberapa lagi kejohanan utama. Begitupun, prestasinya ketika ini boleh dianggap agak terumbang-ambing terutama dalam acara individu susulan masalah kecederaan. Pandelega menjadi atlet negara pertama memenangi pingat emas dalam acara terjun di Komanwel apabila mengungguli acara 10 meter platform individu wanita di New Delhi 2010, diikuti perak di Glasgow, empat tahun kemudian.

Cheong Jun Hoong (terjun)

Cheong Jun Hoong mencipta kejutan apabila menjadi atlet terjun pertama negara memenangi pingat emas di Kejuaraan Dunia tahun lalu di Budapest, Hungary. Begitupun, sejak itu, dia tidak berjaya untuk meneruskan kecemerlangan susulan bergelut dengan masalah kecederaan belakang.




Datuk Lee Chong Wei (badminton)

Pemain nombor enam dunia ini bertekad untuk meletakkan namanya sebagai atlet paling berjaya di Sukan Komanwel. Selepas mengumpul koleksi empat emas setakat ini, pemenang tiga perak Sukan Olimpik itu berpeluang untuk mengatasi rekod yang dipegang beregu negara, Koo Kien Keat yang memenangi lima emas di Komanwel. Chong Wei dijadual bertanding dalam acara perseorangan lelaki dan berpasukan campuran di Gold Coast.

Azizulhasni Awang (berbasikal trek)

Impian atlet kelahiran Dungun, Terengganu ini untuk memenangi emas Komanwel pertama bergantung terhadap tahap kecergasannya selepas masih lagi bergelut dengan masalah jangkitan virus. Azizulhasni yang memenangi pingat gangsa dalam acara pecut berpasukan (2010) dan keirin (2014), akan bertanding dalam acara pecut dan keirin di Gold Coast.



Afiq Afify Rizan-Khairul Adha Rasol (berbasikal trek para)

Atlet berbasikal trek para negara, Afiq Afify Rizan dan jurumudi, Mohd Khairul Adha Rasol pasti terdesak untuk bangkit di Gold Coast berikutan kegagalan mereka untuk mendaki podium di kejohanan Berbasikal Trek Para Dunia di Rio de Janeiro, Brazil, bulan lalu.

Nicol David (skuasy)

Juara dunia lapan kali itu mensasarkan untuk memenangi pingat emas ketiga berturut-turut di temasya Sukan Komanwel. Justeru, atlet kelahiran Pulau Pinang itu tiba lebih awal di Gold Coast untuk mendapatkan keserasian



Emma Firyana Saroji (boling padang)

Emma adalah salah seorang atlet boling padang terbaik di dunia dan membuktikan kejaguhannya apabila memenangi Kejuaraan Dunia pada 2015. Atlet berusia 31 tahun itu berharap memperoleh keputusan lebih baik di Gold Coast selepas hanya memenangi perak pada edisi empat tahun lalu di Glasgow.

Nauraj Singh Randhawa (olahraga)

Atlet berusia 26 tahun itu dilihat sebagai prospek terbaik negara untuk menamatkan kemarau 16 tahun penantian pingat emas dalam acara olahraga. Dengan catatan terbaik 2.30 meter, pemenang tiga kali Sukan SEA itu berpeluang bukan saja untuk melakukan kejutan dengan menamatkan saingan di pentas podium, malah memenangi pingat emas jika dia berjaya mengulangi catatan ketika melakukan rekod kebangsaan.



Azroy Hazal Wafie Izhar Ahmad (angkat berat)

Atlet angkat berat yang bernaung dengan program podium ini adalah harapan utama negara untuk memenangi pingat emas berikutan penggantungan bekas pemenang edisi, Hafifi Mansor akibat doping (steroid anabolic).

Johnathan Wong Guanjie (menembak)

Ia menjadi detik paling membanggakan buat Johnathan dua tahun lalu apabila layak ke Sukan Olimpik 2016 Rio, Brazil secara merit selain menewaskan juara Olimpik dari Vietnam, Hoang Xuan Vinh untuk memenangi pingat emas Sukan SEA Kuala Lumpur 2017 dalam acara 50 meter pistol dan 10 meter air